

Newspaper	BERITA HARIAN
Date	11 JAN 2015

SOP pengurusan banjir besar digubal

» Prosedur baharu diharap dapat kurang kerosakan akibat bah

Oleh Abdul Razak Raaff dan Amin Ridzuan Ishak
bhnews@bh.com.my

Pekan

Prosedur Operasi Standard (SOP) pengurusan banjir besar yang akan digubal dapat mengurangkan risiko dan menyelamatkan kerosakan berbilion ringgit harta benda, kata Datuk Seri Najib Razak.

Perdana Menteri berkata, SOP yang akan dibentangkan kepada Kabinet dalam tempoh enam bulan dari sekarang mengambil kira semua faktor penambahbaikan, termasuk peralatan aset dan kemudahan logistik, latihan simulasi, peranan Jawatankuasa Kemajuan dan Keselamatan Kampung (JKKK), sistem komunikasi dan ramalan cuaca lebih awal dan tepat.

Beliau berkata, prosedur baharu itu penting untuk kerajaan bersiap sedia lebih awal dan menggerakkan pasukan petugas dan anggota keselamatan ke kawasan berisiko tinggi bagi menghadapi banjir besar akibat perubahan iklim global jika berlaku pada hujung tahun.

"Sekarang kita ada SOP banjir biasa dan kita perlu gubal serta mengkaji SOP baharu bagi pengurusan banjir besar, termasuk



Najib bersama Rosmah meriba Muhammad Adam Rayyan Rizqi Mat Shausi dan Nurul Zulaika Fazira Din ketika beramah mesra dengan ibu dalam pantang Junainah Ahmad (kanan) dan Jamaliah Abdul Manaf ketika melawat Pusat Pemindahan Banjir IKBN Paloh Hinai, Pekan.

[FOTO BERNAMA]

soal sistem kawal dan perintah, aset yang sesuai dan umpamanya Angkatan Tentera Malaysia (ATM) sebagai agensi utama, ia harus dilengkapi dengan peralatan lebih sesuai.

Ramalan tepat

"Begitu juga kaji cuaca yang mana kita memiliki kemampuan membuat ramalan lebih tepat supaya amaran awal dapat diberi dan andainya berlaku lagi banjir besar, maka penempatan anggota petugas dan keselamatan dapat ditempatkan seawalnya, tiada masalah berkaitan rangkaian telekomunikasi dan bekalan kemudahan asas.

"Jadi apabila berlaku banjir besar, kita sudah bersedia awal dengan kemampuan lebih baik untuk mengurus mangsa, menyelamatkan harta benda, bekalan air dan elektrik tidak terputus serta mengurangkan kos kerugian kerosakan yang perlu ditanggung rakyat dan kerajaan," katanya pada sidang media di Pusat Operasi Banjir Parlimen Pekan di Baitul Rahah di sini, semalam.

Najib yang juga Ahli Parlimen Pekan bersama isteri, Datin Seri Rosmah Mansor, Menteri Besar, Datuk Seri Adnan Yaakob dan Menteri Sains, Teknologi dan Inovasi, Datuk Dr Ewon Ebin turut

melawat pusat pemindahan banjir di Institut Kemahiran Belia Negara (IKBN) Paloh Hinai, dekat sini, diikuti Sekolah Kebangsaan (SK) Serambi, SK Padang Rumbia, meninjau banjir di Kampung Lamir serta menyampaikan bantuan persekolahan daripada Yayasan Pahang kepada pelajar yang terbabat banjir.

Mengenai punca banjir besar melanda Kelantan, Terengganu, Pahang, Perak dan Johor bulan lalu, Perdana Menteri sudah mengarahkan Ketua Setiausaha Negara (KSN) menyediakan laporan punca sebenar bencana, termasuk cadangan jangka pendek, sederhana dan panjang untuk di-

kemukakan kepada Kabinet yang dijangka siap dalam Mac ini.

"Kita nak tahu faktor apa menyebabkan banjir skala besar kali ini... apabila tahu punca barulah kita boleh tentukan bagaimana mengolah pembangunan negara supaya ia tidak membawa kesan buruk kepada alam sehingga terjadi bencana seperti ini. Ia tidak semestinya berpunca daripada pembalakan atau penerokaan tanah saja, tetapi pelbagai faktor bertembung menyebabkan berlaku banjir besar ini.

Patuhi garis panduan

"Saya turut sarankan kepada Tenaga Nasional Berhad (TNB) supaya pencawangnya dibina di tempat lebih tinggi supaya tidak terjejas apabila berlaku banjir, selain bina rumah tinggi di kawasan yang dikenal pasti sering banjir.

Terdahulu, ketika berucap di IKBN Pekan, Najib meminta rakyat mempunyai perspektif baharu dalam menghadapi bencana dan turut bertanggungjawab bagi mengurangkan punca banjir dengan mematuhi garis panduan dan undang-undang ditepatkan.

"Jika sudah diluluskan kawasan untuk menebang dan membuka tanah pertanian, kita perlu patuh undang-undang. Kalau kelulusan satu ekar (0.4 hektar), jangan buka satu ekar tambah empat. Yang empat ekar lagi jadi tanah haram. Begitu juga kegiatan perlombongan dan penerokaan tanah untuk pertanian perlu mematuhi garis panduan pembangunan untuk mengelak kesan pencemaran alam kerana akhirnya akan berbalik kepada rakyat," katanya.